

新莊呈介十卷

拙安題籤



菽莊主人六十壽言

文

蔣鼎文

儒家言拂輿磅礴之氣充沛於兩間其靈秀之鐘毓
於人者爲名公卿爲名將帥爲維世善俗之士爲抱
道守義之夫雖山林廊廟出處不同要其民物一室
憂樂天下之懷罔勿同也余嘗持此說以與耆舊碩
德者遊覺不吾欺甲戌春領東路軍自閩北轉戰來
廈聞有菽莊林先生者氣度若名公卿忠烈若名將
帥耿介若善俗之士持行若守義之夫乃往式其廬

接其言論丰采于儒家者言益覺信而有徵先生席履豐之業抱豪傑之志本飢溺之忱上治平之策朝廷有蒲輪之徵蒼生存霖雨之望甲午不幸台澎竟以棄地聞先生知清室不足爲毅然決然攜琴劍歸鷺江築菽園於鼓嶼之上人以菽莊主人名先生先生遂以菽莊自號蓋二十餘年於茲矣在此二十餘年中或以爲舉齊眉之案得倡隨之樂傳詩禮之訓有趨庭之歡謂先生爲禮教中人或以爲築藏海之樓寄乘桴之興填補山之阜寓入林之思謂先生爲隱遯中人或又以爲集海內之俊英起文酒之佳會

拂時之念尙未去懷放浪之情形於言笑謂先生爲
遺逸中人先生聞之或頷之或笑之而已其有謂却
禮聘之車拒尊榮之路棄百鎰之鉅失安富之基先
生聞之以爲不值頷與笑也余以督師閩西軍書旁
午不克時與先生敘然馬足所至深知非廢除苛雜
不足以蘇民困非獎勵生產不足以固本原而於國
民經濟尤非保護工商業不足以救衰頽之現象間
嘗質諸先生先生輒舉民德二字爲民族復興之本
其於農村規劃工商業規劃亦多切中肯綮更僕始
得畢其詞憂時之切謀國之忠殆得之扶輿磅礴之

氣以爲當世師也五月吉日爲先生六旬開一華誕之辰余不文謹述所由欽仰者錄爲華堂壽先生儻許爲知言而滿飲三爵歟

陳紹嫻

粵以焉逢淹茂之歲蒼龍稅駕於降婁金人奉劍於曲水菽莊主人構熙春亭適成平泉有記欣草木之芳暉喜雨成文樂賓朋之高會酒樽似海詩卷如山翫景則風月清怡動詠則溪巒繡縵是年五月旣生霸三日實爲先生周甲初度之辰婆娑行地之僊忉利無量之佛松風入聽閣居宏景三層花嶼聯吟社

結香山九老覩須眉之太古垂釣自襲羊裘競腰脚
於後生健步無煩鳩杖巖間豹隱茅容爲東漢名賢
天外鴻冥徐稚是南州高士宜其堂開裴令綠野彌
尊鄉號鄭公黃巾知拜也先生手握智珠胸羅武庫
籊雲紫燕早逐影於虹霓淬水青萍先騰光於牛斗
鯤身橫海家居瞰仙人之磯鹿耳通潮世德拜天妃
之廟扶餘瑞氣瀝爵豫識虬髯向若驚神拂鐘偶鳴
鯨尾濤翻白馬府警黃龍玉斧輕揮珠崖竟棄先生
浮家內渡常隨侍於鯉庭徙宅閒居更營功於鷺渚
凡若茗園鳳髓木採龍涎淘沙出布地之金沈灰鑿

補天之石不貪爲寶望氣能知至慧生明臨淵悉察
然而南陽千金之冶讓腴產於同懷東海萬石之門
承清陰於先葉見者知其爲異人也會輜軒之使南
來纁帛之徵北降輸邊卜式本無志於求官得位王
陽獨殷心於薦士送膺鸚鵡譽握被龍光甫明一道福
星卽耀九霄卿月先生建莞仲官山之榮進范蠡富
國之方備問金曹綰商廈島盈虛奇羨離目無怵發
着歸移銀手如斷庸次比耦環商能守鄭盟陳肆建
標竿馬遙通楚道從此乘舟曰舍掉臂天門障東去
之頽波近南交之墮景指顧間耳無何漢水秋深膠

舟不渡峽星夜動刁斗頻驚逮玉步之旣更尙金車
之狎至先生田歸下撰文移北山閒貽却聘之書戲
廣絕交之札飛鴻遠引海天空綠之鄉倦鳥還棲雲
岫莽蒼之地寄高歌於商谷濯足清流修雅集於月
泉娛情勝友草堂詩史長吟萬里之橋梓澤名園廣
列千人之座每當擘箋刻燭擊鉢傳觴唱涼月以倒
行揖高霞而起立輞川圖畫唱和王裴笠澤釣遊招
邀皮陸紫陽學院亦培桃李新陰碧落孤亭尙憶枕
榔舊夢閒講仙家主旨共閱金經紛羅異域芳馨親
鋤瑤草鸞吟天表四時行樂之圖虎嘯溪頭三笑談

禪之侶忘憂築館娛老名邁清福更見其憂閑豪興
不減於少壯裙屐傲五侯之客子弟都佳壺觴繪六
逸之圖天人亦羨汾陽七貴爭俊彩於荀龍宛委千
函聽清聲於雛鳳此豈若庚桑畏壘僅傳高隱之名
子墨客卿能盡清德之頌者乎紹媽等孔李通家朱
陳姻婣聆東山之絲竹傾北海之樽壘數義熙甲子
之年鶴籌盈屋話句漏庚申之術蝠伏疑仙已蟬蛻
於浮雲自鵠翔於層漢天際真人縹緲樓居看海氣
百重山中歷日舒長觥引介春光九十

李禧

天下才智之士抱違世之志者初未嘗無用世之心
惟用才者甘使世有遺才斯用世者往往才不爲世
用顧世與才相需甚亟懷才者甯忍終與世遺乎故
寤寐嘯歌之頃不忘民胞物與之懷是足以觀世變
覘抱負矣吾友叔臧林先生之出處殆類是甲戌五
月十有八日爲先生六十初度社侶傳箋載酒先期
假菽莊之談瀛軒壽先生座中都數十人酒酣屬余
進一言爲介余曰先生世居鯤洋爲板橋巨族清季
割臺議起先生恥隸外籍避地來廈時廈門方設商
務總會遴先生爲總理旋充度支部幣制調查員農

工商部頭等顧問擢侍郎駸駸大用矣武漢起義乃
跼伏不出癸丑以還國事蝸蟾民生塗炭先生彌厭
時事遂營菽莊爲菟裘隱居其間然時且長廈門市
政會改良市區冀爲桑梓造福倡辦教育尤不遺餘
力嗣養疴瑞士數稔歸國後歲輒避暑廬山築識廬
於山之佳勝處夏去冬回若終與世違焉人第見先
生詩酒流連自適林泉之趣爲足羨而不知先生右
持觴左持觚日與騷人墨客相周旋者其迹雖樂而
心則否也蓋先生固亟於用世者乃者園東拓地數
弓熙春蔚然二亭落成花朝上巳日偕客賦詩脩禊

盤桓未久又遽作廬山之遊先生其將終以才隱乎
人第見先生襍被長征自放烟雨之區爲太超而不
知先生右持觶左持觚日與五老廬君相周旋者其
迹雖樂而心則否也蓋先生固不得已而避世者綜
之遜清季世先生才欲以仕宦顯民國初元先生才
欲以事業著晚近以來先生才欲以詩文晦而一春
吟事先生有冒雨王孝廉亭中看牡丹園東種樹蔚
然亭聽琴熙春亭放歌及和余展上元菽莊猜燈小
詞諸作怡然自得藹乎可親又以知先生違世之志
未盡果也余嘗謂先生以藏海補山名園懼有陸沉

之痛並喻填石之意耳而識廬命名意尤深夫廬山
頻年暑夏達官貴宦大賈富紳咸集廬山面目難識
避暑廬山之人之面目亦難識先生能識廬山能識
避暑廬山之人而先生之面先生之才先生結廬之
意人或未之識先生才足爲世用且用之而效在今
日未應無識之之人余持此以壽先生並以爲壽先
生者告

沈琇瑩

昔在閔逢困敦之歲厲皋之月菽莊主人五十弧辰
琇瑩曾承社侶之命手綴俚辭疊箋爲壽駟隙不居

忽忽十年此十年中主人家居日少出遊日多記事
記言如左右史壹是翔實莫琇瑩若主人周甲琇瑩
無恙社侶援例義不容辭敢操不律鼓以引喤主人
之渡海而東也實唯衆賓稱觴之後送行者自厓而
反風引之去僊乎僊乎人皆以主人爲秦之徐市矣
琇瑩曰不然祖龍御世妄冀長生黠者先覺求藥請
行童男童女占籍亶州奉使無狀甯有歸期主人養
疴壺嶠解后神醫宿疾旣蠲旅居多暇攬物江戶攷
工浪華泮瀑華嚴剔碑豐後嘗以中土遺籍流傳海
國刻意搜羅寢獲古本老屋泰誓葫蘆漢書孫子後

案聯珠詩格置之篋衍寶若球刀徐市何人人間何
世安得有此雅事乎主人之自東徂西也朝發扶桑
暮達瘴海有鶴南飛尺書錄別人皆以主人爲漢之
張騫矣琇瑩曰不然張騫親銜使命探源星宿侈述
聞見語或鑿空龍門載筆史無專傳河渠書後大有
微辭以彼其時天馬有歌鴻鵠有曲蘇李贈答振響
河梁班志藝文不及槎使固知張騫非柏梁臺上人
也主人攬勝瀛寰遐程九萬風土有記山水有志人
物有表讌會有圖奇奇怪怪殫見洽聞發爲詩歌波
譎雲詭西堂竹枝曾何足道峨峨阿羅玄圃之亞太

古積雪天外流霞寓公樓居頗視塵世乘鸞跨鳳士
女往來浮提二子刺血寫經王母萬年傳觴勸酒所
以鄙鴟夷之奇策遠中行之非類外六合而不論薄
都護而不爲令聞廣譽朝報超然不脛而走不翼而
飛標季用夷變夏萬喙一聲大人巍巍學子莘莘梯
山航海絡繹不絕糜費億秭蠹國殃民求其如主人
矯矯獨立物外天全使彼都人士望之若神仙中人
者殆牛毛而麟角乎或曰天下佳山水多矣五丁開
嶂庚辰通川化險爲夷因利乘便主人歸自大秦一
游莫干三游西湖再游匡廬登高臨深窮極幽勝其

晚唐之許碯乎琇瑩曰不然許碯望氣紫垣希蹤黃
石攀躋絕巘獨往獨來摩崖紀歲尋偃月子殘石傳
世僅十餘字天南鴻雪數見雷同主人名山避暑歲
有恆期左提桃葉右絜桃根出以首夏歸以暮秋雲
根瘦削三生片石大書深刻寄託玄遠若說劍若拂
雲若流徵若聽水若覺路若自在天赤文綠字鳳翥
鸞翔別有靈鵲之橋仙人之洞黃龍之潭五言七言
詩刻琳瑯騷人墨客延頸企踵諦觀畫肚高吟擊節
辟之庾摹溫石歐讀索碑三絕興歎累日不去廬山
新志采而錄之宜也昔人有言百萬買宅千萬買鄰